

Na osnovu člana 24. Zakona o sistemu državne pomoći u Bosni i Hercegovini („Službeni glasnik BiH“, broj 10/12 i 39/20) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, po odobrenju Vijeća za državnu pomoć Bosne i Hercegovine, na _____ sjednici održanoj _____ godine, donijelo je

Odluku
o pravilima dodjele de minimis pomoći privrednim subjektima koji pružaju usluge od općeg ekonomskog interesa

POGLAVLJE I - OPĆE ODREDBE

Član 1.
(Predmet)

- (1) Ovom odlukom se uređuju pravila za dodjelu pomoći male vrijednosti (de minimis pomoći) privrednim subjektima koji pružaju usluge od općeg ekonomskog interesa.
- (2) Ovom odlukom vrši se usklađivanje s Uredbom Komisije (EU) 2023/2832 od 13. decembra 2023. godine o primjeni čl. 107. i 108. Ugovora o funkcioniranju Evropske unije na de minimis pomoć dodijeljenu privrednim subjektima koji pružaju usluge od općeg ekonomskog interesa.
- (3) Navođenje odredbi pravnih akata Evropske unije koji se preuzimaju iz stava (2) ovog člana vrši se isključivo u svrhu praćenja i informisanja o preuzimanju pravne stečevine Evropske unije u zakonodavstvo Bosne i Hercegovine.

Član 2.
(Upotreba izraza u muškom ili ženskom rodu)

Riječi koje su radi preglednosti u odluci navedene u jednom rodu bez diskriminacije se odnose i na muški i ženski rod.

Član 3.

(De minimis pomoć koja se dodjeljuje privrednim subjektima koji pružaju usluge od općeg ekonomskog interesa)

- (1) De minimis pomoć za usluge od općeg ekonomskog interesa je pomoć koja se dodjeljuje jednom privrednom subjektu koji pruža usluge od općeg ekonomskog interesa u fiksnom iznosu koji ne smije premašiti gornju granicu od 750.000 EUR tokom bilo kojeg trogodišnjeg razdoblja koji se utvrđuje na kontinuiranoj osnovi, u skladu sa članom 8. ove odluke.
- (2) Privredni subjekt kojem se dodjeljuje de minimis pomoć za pružanje usluge od općeg ekonomskog interesa iz stava (1) ovog člana mora biti ovlašten u pisanom ili elektronskom obliku za pružanje usluge od općeg ekonomskog interesa za koju se dodjeljuje pomoć.

(3) De minimis pomoć koja se dodjeljuje u skladu sa stavom (1) ovog člana ne ispunjava sve kriterije iz definicije državne pomoći iz Zakona o sistemu državne pomoći u Bosni i Hercegovini te se ne smatra državnom pomoći u smislu tog Zakona. Takva pomoć ne podliježe obavezi prijave i odobrenju Vijeću za državnu pomoć Bosne i Hercegovine (u daljnjem tekstu: Vijeće).

Član 4. (Područje primjene)

(1) Ova odluka se primjenjuje na pomoći koje se dodjeljuju privrednim subjektima koji pružaju uslugu od općeg ekonomskog interesa u svim sektorima, osim na:

(a) pomoći koje se dodjeljuju privrednim subjektima koji se bave primarnom proizvodnjom proizvoda ribarstva i akvakulture;

(b) pomoći koje se dodjeljuju privrednim subjektima koji se bave preradom i stavljanjem na tržište proizvoda ribarstva i akvakulture, ako je iznos pomoći utvrđen na temelju cijene ili količine kupljenih proizvoda ili proizvoda stavljenih na tržište;

(c) pomoći koje se dodjeljuju privrednim subjektima u primarnoj proizvodnji poljoprivrednih proizvoda;

(d) pomoći koje se dodjeljuju privrednim subjektima u sektoru prerade i stavljanja na tržište poljoprivrednih proizvoda, u jednom od sljedećih slučajeva:

i. ako se iznos pomoći utvrđuje na temelju cijene ili količine tih proizvoda koji su kupljeni od primarnih proizvođača ili koje privredni subjekti stavljaju na tržište;

ii. ako su pomoći uslovljene njihovim djelomičnim ili potpunim prenošenjem na primarne proizvođače;

(e) pomoći dodijeljene za djelatnosti povezane s izvozom u treće zemlje ili države članice, konkretno pomoći izravno povezane s izvezenim količinama, uspostavljanjem i radom distribucijske mreže ili drugim tekućim rashodima povezanim s djelatnošću izvoza;

(f) pomoći koje se uslovljavaju upotrebom domaćih proizvoda ili usluga umjesto uvoznih.

(2) Ako privredni subjekt djeluje i u jednom od sektora iz stava 1. tačke (a), (b), (c) ili (d) i u jednom ili više sektora obuhvaćenih područjem primjene ove odluke ili obavlja druge djelatnosti obuhvaćene područjem primjene ove odluke, ova se odluka primjenjuje na pomoći dodijeljene u vezi s tim drugim sektorima odnosno djelatnostima, uz uslov da osigura odgovarajućim sredstvima, kao što je razdvajanje djelatnosti ili razdvajanje računa, da djelatnosti u sektorima isključenima iz područja primjene ove Odluke ne ostvaruju korist od de minimis pomoći dodijeljene u skladu s ovom Odlukom.

(3) Za potrebe ove odluke pojam i obuhvat djelatnosti iz stava (1) tač. a), b), c) i d) ovog člana imaju značenje utvrđeno u skladu s odgovarajućim pravilima Evropske unije koja uređuju de minimis pomoć za usluge od općeg ekonomskog interesa.

Član 5. (Definicije)

Izrazi upotrijebljeni u ovoj odluci imaju sljedeće značenje:

a) Usluge od općeg ekonomskog interesa su javne usluge od posebne važnosti za život i zadovoljenje potreba građana, a koje ne bi bile dostupne građanima ili bi im bile dostupne pod manje povoljnim uslovima od uobičajenih ako bi izostala finansijska pomoć davatelja državne pomoći institucija Bosne i Hercegovine, jer ih sami privredni subjekti polazeći isključivo od tržišnih principa nisu u mogućnosti pružiti ili ih nisu u mogućnosti pružiti na zadovoljavajući način u pogledu obima, uslova, cijene, kvaliteta, učestalosti i dostupnosti.

b) davatelj de minimis pomoći je davatelj državne pomoći utvrđen u Zakonu o sistemu državne pomoći u Bosni i Hercegovini;

c) korisnik de minimis pomoći je svaki privredni subjekt, bilo da se radi o pravnoj ili fizičkoj osobi, koji obavlja privrednu djelatnost, bez obzira na pravni status, vrstu vlasničkog odnosa, mjesto registracije/prebivalište i način finansiranja;

d) „jedan privredni subjekt“ obuhvata sve privredne subjekte koji su međusobno povezani na način da je između njih ispunjen najmanje jedan od sljedećih odnosa:

1. jedan privredni subjekt ima većinu glasačkih prava dioničara ili članova u drugom privrednom subjektu;

2. jedan privredni subjekt ima pravo imenovati ili smijeniti većinu članova upravnog, upravljačkog ili nadzornog tijela drugog privrednog subjekta;

3. jedan privredni subjekt ima pravo na ostvarivanje vladajućeg uticaja nad drugim privrednim subjektom na osnovu ugovora sklopljenog s tim subjektom ili na osnovu odredbe njegovog osnivačkog akta ili statuta;

4. jedan privredni subjekt, koji je dioničar ili član u drugom privrednom subjektu, samo kontrolira većinu glasačkih prava dioničara ili glasačkih prava članova u tom privrednom subjektu u dogovoru s drugim dioničarima ili članovima tog subjekta.

e) privredni subjekti koji su u bilo kojem od odnosa navedenih u tački d) alineja 1. do 4. preko jednog ili više drugih privrednih subjekata isto se tako smatraju jednim privrednim subjektom;

f) privredni subjekti koji nisu u međusobnom odnosu, osim što je svaki od njih direktno povezan s istim javnim tijelom ili više javnih tijela ne smatraju se povezanim, odnosno ne smatraju se jednim privrednim subjektom, ako imaju nezavisno pravo odlučivanja;

g) „veliki privredni subjekt“ je privredni subjekt koji ne ispunjava kriterije za mikro, mali ili srednji privredni subjekt prema propisima kojima se uređuje klasifikacija subjekata male privrede u Bosni i Hercegovini, odnosno prema odgovarajućim pravilima Evropske unije.

POGLAVLJE II - USLOVI ZA DODJELU DE MINIMIS POMOĆI

Član 6.

(Gornja granica de minimis pomoći)

(1) Gornja granica od 750.000 EUR koja se može dodijeliti jednom privrednom subjektu koji pruža usluge od općeg ekonomskog interesa tokom bilo kojeg trogodišnjeg razdoblja primjenjuje se bez obzira na oblik de minimis pomoći ili na cilj koji se namjerava postići te nezavisno o tome finansira li se ta pomoć u cijelosti iz budžeta institucija Bosne i Hercegovine, budžeta na razini ostalih nivoa vlasti ili sredstava koja potječu iz Evropske Unije.

(2) De minimis pomoć smatra se dodijeljenom u trenutku kada privredni subjekt stekne zakonsko pravo na primanje pomoći u skladu s nacionalnim pravnim poretkom Bosne i Hercegovine, nezavisno o datumu isplate de minimis pomoći predmetnom privrednom subjektu.

(3) Za potrebe gornje granice iz stava (1) ovog člana pomoći se izražavaju kao gotovinska bespovratna sredstva. Svi iznosi koji se primjenjuju su bruto iznosi, tj. iznosi prije odbitka

poreza i drugih naknada. Ako se pomoć ne dodjeljuje u obliku bespovratnih sredstava, iznos pomoći jednak je bruto novčanoj protuvrijednosti pomoći.

(4) Pomoći koje se isplaćuju u više obroka (rata), a ne jednokratno moraju se diskontirati na vrijednost pomoći u trenutku njene dodjele. Kamatna stopa koju treba primijeniti kod diskontiranja je diskontna stopa koja se primjenjuje u trenutku dodjele pomoći.

(5) Ako bi se dodjelom nove de minimis pomoći za usluge od općeg ekonomskog interesa premašila gornja granica iz stava (1) ovog člana, ta nova pomoć ne može se dodijeliti.

(6) U slučaju spajanja i preuzimanja, pri utvrđivanju prelazi li se gornja granica utvrđena u stavu (1) ovog člana bilo kojem novom de minimis pomoći dodijeljenom novom privrednom subjektu ili privrednom subjektu koji je preuzimatelj, u obzir treba uzeti sve prethodne de minimis pomoći koje su dodijeljene svim privrednim subjektima koji su uključeni u postupak spajanja. De minimis pomoći koje su zakonito dodijeljene prije spajanja ili preuzimanja i nakon toga smatraju se zakonitima.

(7) Ako se jedan privredni subjekt podijeli na dva ili više zasebnih, de minimis pomoć dodijeljena prije te podjele smatra se dodijeljenom onom subjektu koji je od nje ostvario korist, što je u načelu onaj subjekt koji je preuzeo djelatnost za koju je korištena de minimis pomoć. Ako takva raspodjela nije moguća, de minimis pomoć proporcionalno se dodjeljuje na temelju knjigovodstvene vrijednosti vlasničkog kapitala novih privrednih subjekata na datum kada je ta podjela stupila na snagu.

Član 7.

(Pravila za određivanje transparentnosti de minimis pomoći)

(1) De minimis pomoći za usluge od općeg ekonomskog interesa mogu se dodijeliti privrednim subjektima koji pružaju usluge od općeg ekonomskog interesa samo ako je moguće unaprijed, bez potrebe za procjenom rizika, tačno izračunati njenu bruto novčanu protuvrijednost.

(2) De minimis pomoći koje se dodjeljuju u obliku bespovratnih sredstava ili subvencioniranih kamatnih stopa smatraju se transparentnim de minimis pomoćima u smislu stava (1).

(3) Pomoći u obliku zajmova smatraju se transparentnim de minimis pomoćima, ako su ispunjeni sljedeći uslovi:

a) ako se nad privrednim subjektom ne provodi stečajni postupak radi nesolventnosti u skladu sa propisima kojima se uređuje stečajni postupak, niti on u skladu s tim zakonom, ispunjava kriterije da se nad njim pokrene stečajni postupak na zahtjev vjerovnika. Kada se radi o velikim privrednim subjektima, oni mogu biti korisnici de minimis pomoći u ovom slučaju ako se nalaze u situaciji koja odgovara barem kreditnom rejtingu „B-“, i/ili

b) ako je zajam osiguran kolateralom kojim je pokriveno najmanje 50 % zajma i zajam iznosi ili 3.750.000 EUR u razdoblju od pet godina ili 1.875.000 EUR u razdoblju od 10 godina; ako je zajam manji od tih iznosa ili je odobren na razdoblje od pet odnosno deset godina, bruto novčana protuvrijednost tog zajma izračunava se kao srazmjerni dio gornje granice de minimis pomoći za usluge od općeg ekonomskog interesa ili

c) ako je bruto novčana protuvrijednost izračunata na temelju referentne stope primjenjive u trenutku dodjele.

(4) Pomoći koje su sadržane u dokapitalizacijama smatraju se transparentnim de minimis pomoćima samo ako ukupan iznos dokapitalizacije koju su izvršila javna tijela ne premašuje gornju granicu de minimis pomoći za usluge od općeg ekonomskog interesa.

(5) Pomoći koje su sadržane u mjeri rizičnog finansiranja u obliku vlasničkog ili kvazivlasničkog ulaganja smatraju se transparentnim de minimis pomoćima samo ako kapital koji je dodijeljen jednom privrednom subjektu ne prelazi gornju vrijednost de minimis pomoći za usluge od općeg ekonomskog interesa.

(6) Pomoći koje se dodjeljuju u obliku državnih garancija smatraju se transparentnim de minimis pomoćima ako su ispunjeni sljedeći uslovi:

a) ako se nad privrednim subjektom ne provodi stečajni postupak zbog nesolventnosti u skladu sa zakonom o stečaju niti on ispunjava kriterije da se nad njim pokrene stečajni postupak zbog nesolventnosti na zahtjev vjerovnika. Kada se radi o velikim privrednim subjektima, oni mogu biti korisnici de minimis pomoći u ovom slučaju ako se nalaze u situaciji koja odgovara barem kreditnom rejtingu „B-“, i/ili

b) ako državna garancija ni u jednom trenutku ne premašuje 80 % osnovnog zajma, gubitke snose jednako i na isti način zajmodavac i jamac, neto povrati koji proizlaze iz naplate zajma iz garancija koje je dao zajmoprimac jednako smanjuju gubitke koje snosi zajmodavac i jamac te je zagarantovani iznos

5.625.000 EUR, a trajanje garancije pet godina ili je zagarantovani iznos 2.813. 036 EUR, a trajanje garancije deset godina; ako je zajamčeni iznos manji od tih iznosa ili se garancija odnosi na razdoblje kraće od pet odnosno deset godina, bruto novčana protuvrijednost te garancije izračunava se kao proporcionalni dio odgovarajuće gornje granice utvrđene de minimis pomoći za usluge od općeg ekonomskog interesa, ili

c) ako je bruto novčana protuvrijednost izračunana na osnovu premija sigurne luke utvrđenih propisima ili smjernicama kojima se uređuju državne garancije; ili

d) prije provedbe, ako su ispunjeni sljedeći uslovi:

i. ako je metodologija koja se koristi za izračun bruto novčana protuvrijednosti garancije prijavljena Vijeću za državnu pomoć na temelju nekog drugog propisa u području državnih pomoći koja se primjenjuje u tom trenutku i koju je Vijeće prihvatilo kao usklađenu s pravilima o pomoćima o jamstvima; i

ii. ako se ta metodologija izričito odnosi na vrstu garancije i vrstu temeljne transakcije koje su obuhvaćene područjem primjene pravila o de minimis pomoći za usluge od općeg ekonomskog interesa.

(7) Pomoći u obliku drugih instrumenata smatraju se transparentnim de minimis pomoćima ako je u okviru toga instrumenta gornja vrijednost kojom se osigurava da se neće premašiti gornja dopuštena granica de minimis pomoći za usluge od općeg ekonomskog interesa.

Član 8.

(Razdoblje koje se uzima u obzir kod dodjele nove de minimis pomoći)

Trogodišnje razdoblje koje se mora uzimati u obzir pri dodjeli de minimis pomoći za usluge od općeg ekonomskog interesa utvrđuje se na kontinuiranoj osnovi tako da se pri svakoj novoj dodjeli de minimis pomoći uzima u obzir ukupan iznos de minimis pomoći dodijeljenih u tri prethodne godine.

Član 9. (Kumulacija)

- (1) De minimis pomoći koje se dodjeljuju za usluge od općeg ekonomskog interesa mogu se kumulirati s de minimis pomoćima dodijeljenima u skladu s drugim propisima koji uređuju dodjelu de minimis pomoći.
- (2) De minimis pomoći koje se dodjeljuju za usluge od općeg ekonomskog interesa ne smiju se kumulirati s bilo kojom drugom naknadom za istu uslugu, bez obzira na to predstavlja li ona državnu pomoć.
- (3) De minimis pomoći koje se dodjeljuju za usluge od općeg ekonomskog interesa ne smiju se kumulirati s državnim pomoćima u vezi s istim prihvatljivim troškovima niti s državnim pomoćima za istu mjeru rizičnog finansiranja ako bi se takvom kumulacijom premašio najviši relevantni intenzitet pomoći ili iznos pomoći koji je za konkretan slučaj utvrđen propisima koji uređuju namjenu, kriterije i uslove za dodjelu državne pomoći, odnosno odlukom Vijeća.
- (4) De minimis pomoći koje nisu dodijeljene za određene prihvatljive troškove ili se ne mogu pripisati takvim troškovima mogu se kumulirati s drugim državnim pomoćima dodijeljenima na osnovu propisa iz stava (3) ovog člana ili odluke Vijeća.

III. DODJELA, PRAĆENJE I IZVJEŠTAVANJE O DE MINIMIS POMOĆI

Član 10.

(Dodjela de minimis pomoći za usluge od općeg ekonomskog interesa)

- (1) Kada davatelj de minimis pomoći namjerava privrednom subjektu dodijeliti de minimis pomoć za pružanje usluga od općeg ekonomskog interesa, dužan je toga privrednog subjekta pisanim ili elektronskim putem obavijestiti o iznosu pomoći izraženom u bruto novčanoj protuvrijednosti i o njezinom de minimis karakteru, direktno upućujući na Odluku na osnovu koje se ta de minimis pomoć dodjeljuje. Obrazac Obavijesti o dodijeljenoj de minimis pomoći nalazi se u Aneksu II. ove Odluke.
- (2) Kada se de minimis pomoć za usluge od općeg ekonomskog interesa dodjeljuje različitim privrednim subjektima na osnovu programa pomoći, a u okviru tog programa se tim privrednim subjektima dodjeljuju različiti iznosi pojedinačnih pomoći, davatelj obavještava svakog privrednog subjekta koji je korisnik pomoći, o iznosu koji odgovara najvišem iznosu pomoći koji će mu se dodijeliti u okviru tog programa. U tom slučaju taj fiksni iznos služi za provjeru poštivanja gornje granice de minimis pomoći za usluge od općeg ekonomskog interesa.
- (3) Prije dodjele pomoći, davatelj pomoći od predmetnog privrednog subjekta mora dobiti izjavu, u pisanom ili elektronskom obliku, o svakoj drugoj de minimis pomoći za pružanje usluga od općeg ekonomskog interesa i drugim de minimis pomoćima primljenim tokom bilo kojeg trogodišnjeg razdoblja. Ta izjava mora uključivati i podatke o de minimis pomoćima koje su primili povezani privredni subjekti koji zajedno čine „jednog privrednog subjekta“. Obrazac Izjave o primljenim de minimis pomoćima nalazi se u Aneksu I. ove Odluke.
- (4) Davatelj pomoći može dodijeliti novu de minimis pomoć za uslugu od općeg ekonomskog interesa tek nakon što utvrdi da ukupan iznos de minimis pomoći koji je predmetni privredni subjekt primio neće premašiti gornju granicu de minimis pomoći za usluge od općeg

ekonomskog interesa te da su ispunjeni svi uslovi za dodjelu te pomoći predviđeni ovom Odlukom.

(5) Radi utvrđivanja da li određeni privredni subjekt ispunjava uslove za dodjelu pomoći iz stava (4) ovog člana, a zbog moguće promjene okolnosti od trenutka zaprimanja zahtjeva za dodjelu de minimis pomoći za uslugu od općeg ekonomskog interesa do donošenja odluke o dodjeli de minimis pomoći, davatelj pomoći je ovlašten neposredno prije donošenja te odluke, a nakon što utvrdi da su ispunjeni svi ostali uslovi za dodjelu de minimis pomoći, zatražiti od privrednog subjekta novu izjavu iz stava (3) ovog člana.

Član 11.

(Evidencija i izvještavanje o dodijeljenim de minimis pomoćima)

(1) Davatelj de minimis pomoći za usluge od općeg ekonomskog interesa dostavlja informacije o dodijeljenim de minimis pomoćima Ministarstvu vanjske trgovine i ekonomskih odnosa Bosne i Hercegovine u roku od 20 dana od dana dodjele. Obrazac evidencije o dodijeljenim de minimis pomoćima nalazi se u Aneksu III ove Odluke.

(2) Ministarstvo vanjske trgovine i ekonomskih odnosa BiH vodi evidenciju o dodijeljenim de minimis pomoćima u trajanju od 10 godina od datuma dodjele, uključujući podatke o korisniku, iznosu pomoći, predmetnoj usluzi, datumu dodjele i instrumentu pomoći.

(3) Ministarstvo vanjske trgovine i ekonomskih odnosa BiH do 30. juna svake godine sačinjava zbirni izvještaj o dodijeljenim de minimis pomoćima za prethodnu kalendarsku godinu i dostavlja ga Vijeću za državnu pomoć BiH, uz podatke o broju korisnika, ukupnom iznosu i iznosima po sektorima prema klasifikaciji NKD.

(4) Do uspostave tehničkih i institucionalnih kapaciteta za vođenje središnjeg registra de minimis pomoći, pojedinačnu evidenciju vodi davatelj pomoći, uz obavezu dostavljanja podataka Ministarstvu vanjske trgovine i ekonomskih odnosa BiH i Vijeću za državnu pomoć BiH.

Član 12.

(Ocjena i nadzor Vijeća)

Ministarstvo vanjske trgovine i ekonomskih odnosa Bosne i Hercegovine, na pisani zahtjev Vijeća, u roku od 20 radnih dana, ili u dužem roku navedenom u tom zahtjevu, Vijeću dostavlja sve informacije koje Vijeće smatra potrebnima kako bi ocijenilo jesu li ispunjeni uslovi iz ove Odluke, a posebno informacije o ukupnom iznosu de minimis pomoći u smislu ove odluke i drugih propisa o de minimis pomoćima koje je primio bilo koji privredni subjekt.

POGLAVLJE IV - ZAVRŠNE ODREDBE

Član 13.

(Obaveza primjene odluke)

Ovu odluku obavezno primjenjuju institucije Bosne i Hercegovine i sve pravne osobe osnovane od institucija Bosne i Hercegovine koje dodjeljuju ili upravljaju državnom pomoći.

Član 14.

(Stupanje na snagu)

Ova odluka stupa na snagu danom donošenja i objavljuje se u „Službenom glasniku Bosne i Hercegovine“.

VM broj _____ / _____
_____ 20__ . godine
Sarajevo

Predsjedateljica
Vijeća ministara BiH

Borjana Krišto

Aneks I

IZJAVA o primljenim de minimis pomoćima za usluge od općeg ekonomskog interesa

Na osnovu člana Odluke o (navesti objavu u službenom glasniku)

Naziv privrednog subjekta	
Adresa sjedišta	
Identifikacijski (registarski) broj	

Izjavljujem da privredni subjekt koga predstavljam i privredni subjekti s kojima smo povezani⁷ na način propisan članom 3. Odluke o _____ tokom bilo kojeg trogodišnjeg razdoblja⁸ (staviti X na odgovarajuće mjesto):

o Nije/nisu primio/li de minimis pomoć

o Primio/li je/su de minimis pomoć

Ako je odgovor pozitivan, obavezno ispuniti sljedeću tablicu:

	Davatelj de minimis pomoći	Namjena ili projekti za koje su odobrene de minimis pomoći	Iznos korištene de minimis pomoći u KM i EUR ¹ u trogodišnjem razdoblju
			Razdoblje od datuma podnošenja izjave i prethodnih 36 mjeseci
1.			
2.			
3.			

Pod kaznenom i materijalnom odgovornošću izjavljujem da su podaci koje sam upisao/la u ovoj izjavi potpuni i istiniti.

Datum podnošenja izjave: _____ 20__ . godine

Potpis odgovorne osobe i pečat

⁷ „Jednim privrednim subjektom“ smatraju se svi privredni subjekti, odnosno grupa povezanih privrednih subjekata koji su barem u jednom od sljedećih odnosa jedan prema drugom:

a) određeni privredni subjekt ima većinu glasačkih prava dioničara ili članova u drugom privrednom subjektu;

b) određeni privredni subjekt ima pravo imenovati ili smijeniti većinu članova upravnog, upravljačkog ili nadzornog tijela drugog privrednog subjekta;

c) određeni privredni subjekt ima pravo na ostvarivanje vladajućeg utjecaja nad drugim privrednim subjektom na osnovu ugovora sklopljenog s tim subjektom ili na osnovu odredbe njegovog osnivačkog akta ili statuta;

d) određeni privredni subjekt, koje je dioničar ili član u drugom privrednom subjektu, samo kontrolira većinu glasačkih prava dioničara ili glasačkih prava članova u tom privrednom subjektu u dogovoru s drugim dioničarima ili članovima tog subjekta.

⁸ Razdoblje od tri godine koje prethodi podnošenju izjave

Aneks II

OBAVIJEST

o dodijeljenoj de minimis pomoći za pružanje usluge od općeg ekonomskog interesa

1. Podaci o davatelju *de minimis* pomoći:

Naziv	
Adresa	

2. Podaci o primatelju *de minimis* pomoći:

Naziv ⁹	
Sjedište ¹⁰	
Identifikacijski broj	

3. Podaci o *de minimis* pomoći:

Potvrđujemo da sredstva koja se dodjeljuju:

- dana..... [dan dodjele *de minimis* pomoći]¹¹
- na temelju[pravni temelj za dodjelu *de minimis* pomoći]
- u obliku¹²
- u vrijednosti od.....KM
- u protuvrijednosti..... EUR¹³
- Namjena/cilj.....
- Instrument dodjele.....
- Datum dodjele.....

predstavljaju *de minimis* pomoć u smislu Odluke o pravilima (navesti objavu u službenim novinama).

Mjesto i datum izdavanja _____

Odgovorna osoba davatelja *de minimis* pomoći

Potpis _____

⁹ Naziv privrednog subjekta (trgovačkog društva, udruženja, ustanove ili druge pravne osobe) kojemu je dodijeljena *de minimis* pomoć

¹⁰ Adresa sjedišta privrednog subjekta na kojoj obavlja registriranu djelatnost.

¹¹ *De minimis* pomoć smatra se dodijeljenom u trenutku kada je privredni subjekt u skladu s odgovarajućim aktom davatelja pomoći (program pomoći/odluka o pojedinačnoj pomoći) stekao pravo na primanje pomoći, nezavisno o datumu isplate pomoći.

¹² Primjerice: bespovratna sredstva, porezna izuzeće, kredit pod povoljnijim uslovima, garancija, itd.

¹³ Preračunato po srednjem kursu Centralne banke BiH koji vrijedi na dan kada privredni subjekt stekne zakonsko pravo na primanje *de minimis* pomoći

Aneks III

Naziv davatelja: _____

Identifikacijski broj: _____

EVIDENCIJA o dodijeljenim de minimis pomoćima

Naziv korisnika, adresa i identifikacijski broj	Vrsta usluga od općeg ekonomskog interesa za koju se pomoć dodjeljuje i NACE oznaka djelatnosti	Ovlaštenje za pružanje usluge od općeg ekonomskog interesa ¹⁴	Broj i datum akta kojim se dodjeljuje de minimis pomoć	Iznos dodjeljene de minimis pomoći KM i EUR	Instrument dodjele de minimis pomoći	Trajanje de minimis pomoći
1	2	3	4	5	6	7

¹⁴ Osnovni propis ili drugi akt davatelja pomoći koji predstavlja polazni osnov za dodjelu de minimis pomoći (zakon, uredba, program, pravilnik, odluka i dr.), navesti službene novine ako je bilo objave.

OBRAZLOŽENJE PRIJEDLOGA ODLUKE
O PRAVILIMA DODJELE DE MINIMIS POMOĆI PRIVREDNIM SUBJEKTIMA KOJI
PRUŽAJU USLUGE OD OPĆEG EKONOMSKOG INTERESA

I - PRAVNI OSNOV ZA DONOŠENJE ODLUKE

Predloženom Odlukom vrši se usklađivanje domaćeg zakonodavstva u oblasti državne pomoći sa pravnom stečevinom Evropske unije u dijelu koji se odnosi na de minimis pomoć za usluge od općeg ekonomskog interesa.

Pravni osnov za donošenje Odluke o pravilima dodjele de minimis pomoći privrednim subjektima koji pružaju usluge od općeg ekonomskog interesa (u daljnjem tekstu: Odluka) sadržan je u članu 17. Zakona o Vijeću ministara Bosne i Hercegovine („Službeni glasnik BiH”, br. 30/03, 42/03, 81/06, 76/07, 81/07, 94/07 i 24/08) i članu 24. Zakona o sistemu državne pomoći u Bosni i Hercegovini („Službeni glasnik BiH“, br. 10/12 i 39/20), u vezi sa članom 6. stav (3) istog zakona.

II - RAZLOZI ZA DONOŠENJE ODLUKE

Članom 17. Zakona o Vijeću ministara Bosne i Hercegovine je propisano da Vijeće ministara u ostvarivanju svojih prava i dužnosti donosi odluke, zaključke i rješenja, usvaja nacрте i prijedloge zakona, analize, informacije, strategijske dokumente, programe, sporazume, protokole i druge akte.

Članom 24. Zakona o sistemu državne pomoći u Bosni i Hercegovini („Službeni glasnik BiH“, broj 10/12 i 39/20) je propisano da svi organi za provođenje Zakona (Bosna i Hercegovina, Federacija Bosne i Hercegovine, Republika Srpska i Brčko distrikt Bosne i Hercegovine) usvajaju podzakonske akte kojim će se detaljnije urediti pravila za dodjelu pomoći male vrijednosti (de minimis pomoć) uzimajući u obzir odgovarajuća pravila o de minimis pomoći u Evropskoj uniji. Federacija BiH je donijela Uredbu o uslovima za dodjelu državne pomoći u obliku naknade za obavljanje i izvršenja javnih usluga privrednim subjektima kojima je povjereno obavljanje usluga od općeg ekonomskog interesa („Službene novine FBiH“, broj 27/18). Republika Srpska je donijela Uredbu o dodjeli državne pomoći privrednim subjektima za obavljanje javnih usluga od opšteg ekonomskog interesa („Službeni glasnik RS, broj 111/20,). U tom pogledu i nivo Bosne i Hercegovine je zakonski obavezan da donese odgovarajući podzakonski akt.

Shodno preporukama Evropske komisije sa prethodnih sastanaka Pododbora za unutrašnje tržište i konkurenciju u okviru provedbe SSP-a da se trebaju donijeti podzakonski akti, Vijeće ministara BiH je Zaključkom sa 174. sjednice održane 2. 7. 2019. godine, obavezalo MVTEO da pripremi nacрте tri podzakonska akta od kojih je jedan i Prijedlog odluke o pravilima dodjele de minimis pomoci privrednim subjektima koji pružaju usluge od općeg ekonomskog interesa. Odlukom se utvrđuju pravila o manjim iznosima državnih pomoći koje su izuzete iz nadzora državnih pomoći jer se smatra da ne utječu na tržišnu konkurenciju i trgovinu na unutrašnjem tržištu.

III - USKLAĐENOST PROPISA S EVROPSKIM ZAKONODAVSTVOM

Ovom odlukom se vrši usklađivanje sa zakonodavstvom Evropske unije. Osnovni propis EU s kojim je vršeno usklađivanje je Uredba Komisije (EU) broj 2023/2832 od 13. decembra 2023. godine o primjeni članova 107. i 108. Ugovora o funkcioniranju EU na de minimis pomoći (Sl. list EU, serija L, 15.12.2023.) (u daljnjem tekstu: Uredba).

Odluka se bazira na sljedećim principima:

Princip aktivne harmonizacije zakonodavstva Bosne i Hercegovine

Sporazum o stabilizaciji i pridruživanju između Bosne i Hercegovine i Evropske unije („Službenik glasnik BiH” – izdanje Međunarodni ugovori broj 10/08), koji je stupio na snagu 1. 6. 2015. godine, ima svoju posebnost u pogledu sadržaja ugovorenih obaveza za državu pretendenta za članstvo u EU. S pravnog aspekta se posebnost SSP-a ogleda u činjenici da je stipulirana ugovorna klauzula usklađivanja nacionalnog zakonodavstva sa *acquis*-em EU. Harmonizacijska klauzula, ugrađena u SSP zemalja zapadnog Balkana i gotovo identičnog sadržaja, tipično propisuje da će aspirant uskladiti postojeće zakonodavstvo sa zakonodavstvom EU-a. Članom 70. SSP-a Bosna i Hercegovina se obavezuje da osigura postepeno usklađivanje zakonodavstva sa *acquis*-em i osigura provođenje propisa. Ugovorne obaveze za BiH su obaveza aktivne harmonizacije koju provode zakonodavna i izvršna vlast, te obaveza interpretativne harmonizacije u skladu sa načelom *in dubio pro conventione* za šta je zadužena sudska vlast, tj. interpretaciju nacionalnog prava u skladu s međunarodnim ugovorom. Kako je na snagu stupio Zakon o izmjenama i dopunama Zakona o sistemu državne pomoći u Bosni i Hercegovini („Službeni glasnik BiH“, broj 39/20) potrebno je pristupiti donošenju odgovarajućih podzakonskih akata.

Princip transparentnosti podrazumijeva potrebu upravljanja budžetskim sredstvima na otvoren način sa podacima dostupnim javnosti. Intencija upravljanja budžetskim sredstvima je smanjiti državne pomoći na što manji nivo. Efikasna i fer primjena pravila o konkurenciji, naročito kada se radi o državnoj pomoći, zahtijeva transparentnost u odnosima između davatelja i korisnika državne pomoći.

Princip integralnog prikaza državnih pomoći podrazumijeva kreiranje redovnih godišnjih izvještaja o dodijeljenim državnim pomoćima, efikasnost nadzora nad odobravanjem, provođenjem i povratom državnih pomoći.

IV - OBRAZLOŽENJE PREDLOŽENIH RJEŠENJA

Članom 1. predložene odluke uređuju se pravila dodjele de minimis pomoći privrednim subjektima koji pružaju usluge od općeg ekonomskog interesa. Članom 1. st. (2) i (3) Odluke vrši se usklađivanje s Uredbom Komisije (EU) 2023/2832 od 13. decembra 2023. godine o primjeni čl. 107. i 108. Ugovora o funkcioniranju Evropske unije na de minimis pomoći dodijeljene privrednim subjektima koji pružaju usluge od općeg ekonomskog interesa.

Član 2. Odluke definira upotrebu izraza u muškom i ženskom rodu.

Član 3. Odluke uređuje osnovno pravilo dodjele de minimis pomoći za usluge od općeg ekonomskog interesa, propisuje gornju granicu od 750.000 EUR u bilo kojem trogodišnjem razdoblju, obavezu da korisnik bude ovlašten za pružanje predmetne usluge, te utvrđuje da takva pomoć ne podliježe obavezi prijave i odobrenja Vijeću za državnu pomoć Bosne i Hercegovine. Ove odredbe usklađene su sa članom 2. stav (1) i članom 3. Uredbe (EU) 2023/2832.

Član 4. Odluke propisuje područje primjene što je usklađeno sa članom 1. Uredbe EU.

Član 5. Odluke definiše pojmove: usluge od općeg ekonomskog interesa, davatelj de minimis pomoći, korisnik pomoći i „jedan privredni subjekt“, što je usklađeno s članom 2. Uredbe (EU) 2023/2832.

Član 6. Odluke uređuje gornju granicu dozvoljenih iznosa pomoći male vrijednosti na način kako je to propisano u članu 3. Uredbe EU 2023/2832.

Član 7. Odluke propisuje pravila za određivanje transparentnosti de minimis pomoći, odnosno obavezu da se svaki oblik pomoći izrazi kao bruto novčana protuvrijednost, radi provjere poštivanja gornje granice. Ova odredba je usklađena s članom 4. Uredbe (EU) 2023/2832.

Član 8. Odluke propisuje period od tri godine na kontinuiranoj osnovi kao vremenski okvir što je u skladu s članom 3. Uredbe EU.

Član 9. Odluke sadrži odredbe o kumulaciji pomoći iz više izvora, kumulaciji de minimis pomoći s drugim de minimis i državnim pomoćima, odnosno više davatelja pomoći, što je u skladu s članom 5. Uredbe EU-a.

Član 10. Odluke propisuje način na koji davatelj pomoći obavještava privrednog subjekta – korisnika pomoći o namjeri dodjele de minimis pomoći, te propisuje u Aneksu II ove odluke kako izgleda unificiran obrazac obavještenja. Istim članom propisana je obaveza korisnika da dostavi izjavu o primljenim de minimis i drugim državnim pomoćima, pri čemu se obrazac izjave nalazi u Aneksu I Odluke. Navedene odredbe su u skladu sa članom 6. Uredba(EU) 2023/2832.

Član 11. propisuje obavezu davatelja pomoći da vode evidenciju o de minimis pomoći i istu dostavljaju Ministarstvu vanjske trgovine i ekonomskih odnosa kao nadležnom tijelu za provođenje odredbi Zakona o sistemu državne pomoći u Bosni i Hercegovini i Vijeću za državnu pomoć Bosne i Hercegovine kao regulatornom tijelu. Obrazac evidencije o dodijeljenim de minimis pomoćima se nalazi u Aneksu III Odluke. Ovaj je član u skladu s članom 6. Uredbe EU.

Član 12. utvrđuje ovlaštenje Vijeća za državnu pomoć Bosne i Hercegovine da vrši nadzor nad primjenom ove Odluke.

Član 13. definirana je obaveza primjenjivanja Odluke.

Članom 14. utvrđen je datum stupanja na snagu Odluke, te obaveza objavljivanja iste u „Službenom glasniku BiH” u skladu s čl. 63. i 64. Poslovnika o radu Vijeća ministara („Službeni glasnik BiH”, broj 22/03).

V NAČIN IZVRŠENJA PREDLOŽENE ODLUKE (ROKOVI, MJERE, AKTIVNOSTI)

Svi potencijalni davatelji de minimis pomoći privrednim subjektima koji pružaju usluge od općeg ekonomskog dobra na nivou institucija Bosne i Hercegovine su dužni upoznati se sa sadržinom ove odluke i po njoj postupati.

VI - FINANSIJSKA SREDSTVA

Predložena rješenja su u potpunosti usklađena sa Uredbom (EU) 2023/2832 i ne stvaraju dodatne finansijske obaveze za institucije Bosne i Hercegovine izvan postojećih budžetskih okvira.

VII - OPIS KONSULTACIJA VOĐENIH U PROCESU IZRADE PRIJEDLOGA ODLUKE

Predlagač Odluke je Ministarstvo vanjske trgovine i ekonomskih odnosa, u skladu s odredbama Zakona o sistemu državne pomoći u BiH i članu 9. Zakona o ministarstvima i drugim tijelima

uprave BiH („Službeni glasnik BiH”, br. 5/03, 42/03, 26/04, 42/04, 45/06, 88/07, 35/09, 59/09, 103/09, 87/12, 6/13 i 19/16) kojim je propisana nadležnost ovog Ministarstva za oblast konkurencije čiji je sastavni dio i državna pomoć (spajanja ili koncentracije privrednih subjekata, zabranjeni sporazumi ili karteli, antitrust i državna pomoć).

Prijedlog će odluke biti dostavljen Direkciji za evropske integracije Vijeća ministara BiH, Ministarstvu finansija i trezora, Uredu za zakonodavstvo Vijeća ministara BiH, Konkurencijskom vijeću i Vijeću za državnu pomoć.